



鄭少谷先生全集卷二十

閩中鄭善夫繼之著

後學鄭奎光章甫訂

書四

與梁日孚

別後凡數寄書再不得吾兄消息杜門索居無
他念慮一則日望太平使吾輩山林之下得以
穩睡一則恐離羣日久學業就荒矣聞應石門
已南歸近亦有書來知吾子居京師亦頗持獨

興懷興懷又聞白浦在西江與虞佐少有言白
浦執言忠良會事古今多少賢達祇爲區區血
氣所驅使害了一生此事果爾不敢爲白浦長
也近况如何關河許遠音問稀闊不識繼此再
得如往時否也苦心相聞不盡所欲言

會思道

西湖別後得嘉興手札宦况今如何或出或處
或久或速君子惟其是而安耳方今政治更始
正吾輩行志時節先甲後甲理亂緒幹文蠱端
在諸賢得時最難時難得而易失時非高爵厚
祿之云也古人往往寧蓬累而行者謂何際遇
難也今天下百務極矣生民之苦未有甚於此
時者矣事極而反常數也今海內豪傑之士皆
有彈冠之志欲行其學但不忍辱其身矣吾兄
珍重珍重善夫日來無他喜好近結草堂於湖
曲日對田叟牧豎談村鄙中事仕進之念已索
然無餘所餘者望治矣面晤末由臨風悵惜

答平厓

海濱杜門屢得動定甚欲吾子同隱今 皇帝
道化維新吾輩草茆荒僻莫不有茹連之志何
者行義達道本吾儒性分內事吾輩羈縻廩祿
相率引去者非好爲孤潔之行也苦於上下不
交也致君堯舜今其時乎時不可失天下第一
等事莫讓與他人做去孔子三月無君則皇皇
其志非以求富貴利達也萬萬自此堅忍其志
伯子云一命之士苟存心愛物於人必有所濟
百司庶職莫不有經濟存焉勿曰吾未當其位
未得盡行其所學也善夫病苦彌年煙霞之疾
未瘳徒有耿耿耳拭目以俟同志者不備

畚倪小野

善夫啓曲江使人至李公衡至兩拜書兼以公
衡口所稱述慰慰以南雄之小以吾兄爲之非
是了公家事便爲稱職也况今 聖明在上切
切求太平太平事業何所始何所終四時之氣
自一心而推之萬方之政自一郡而大之是已
吾兄珍重珍重善夫自抵家削迹荒村與野老

無別近哭 先皇帝一進城耳又家食朝餽暮
粥飲水甚甘也家孥輩不知吾輩安身處覺其
局促勞苦耳夫子云邦有道貧且賤焉耻也士
君子欲自愛其身不爲枉尺直尋則亦安往而
辭貧賤焉勞兄遠念漫及心事天下將太平吾
輩耕岩釣海何適不樂秋末天台諸友欲往少
谷遂爲羅浮之行非漫說也

畬道夫

价來承惠草堂貲此時正窘促甚爲得力曲江
新政甚有精神喜慰喜慰吾兄知剛柔內外之
道乎孔子云禮以行之孫以出之外柔內剛剛
柔相濟而不相勝者萬事之所以成也况一邑
乎蒞事貴精勤又貴簡靜精勤而不簡靜則羣
小易欺簡靜而不精勤則衆務多廢二者貴相
須而不可偏有者也近聞吾兄甚精勤恐未必
簡靜簡靜最難事必須學力學力非窮經博古
詞章記誦之云也吾兄幼時曾熟讀大學與中
庸今但舉二首篇細思而力行之是耳方今

聖天子求治甚切吾輩幸丁其時在外則堯舜其民百里雖小最近民者也非求大學問安有大事業吾兄鄭重善夫自廢彌年矣古人幼學壯行上有聖君故不忍枉已以出也不然作堯舜巢由歌誦太平如何明歲過羅浮經曲江欲作太山孫明復乞俸錢耳添丁之信如何懸念懸念七月五日善夫頓首

答戴宗道考功

近拜二月四日手書教愛良深所喻放浪山水

間以有限之歲月供無窮之耳目意思大好再三把玩以爲藥石也走年來於山水之興不覺頓減非有所長進而恐喪志者想亦精氣短少自然有不逮然也自渡江卽聞孫太初之死一往吳興稍致死生交誼再又與應黃二子有夙諾遂過天台與居月餘而後竟趨武夷摩挲數日慨然有卜居之志實非爲山水濡滯也今者易寒暑杜門荒村兀坐一室而已近哭先皇帝始一至城當路了不知有僕也今聖天子

在上賢士幽側以次彙征而不肖貧賤如此恥也但人處淡泊內視平平耳吾兄司人物衡鑑聖天子如此求治而吾聞尚苦酷吏奈何昔孝廟時有君而無臣至今爲恨非無臣也位不當人人不當位上下頗也善夫徒有其志山林無預願以此爲足下獻

答朱守中侍御

計兄是行必得會陽明必大有所得致知之說大好數年同志所講明所用力豈外得此物但舊說雜沓於胸臆不能脫然篤信而力行之也凡人挾其所有語之以所無則惑守其故常語之以所異非惟惑也且羣然而議之耳善夫比歸惟杜門溫習舊得靜中時時紬繹始覺得此心大是難捉縛的物方見古人下死工夫處孔門由賜而下人物未可輕議也陽明先生立此大功業今又遭值聖明善夫日聽其大行不加意思以爲法程未由侍履門下心歆如也素翁隱志甚堅山齋已在行松厓伯固想當膺命而

赴草野薄劣貧賤惟甘曰惟祝吾君聖壽萬
年以致雍熙之治矣所以會兄之知如此而已
奉晤何時想憶極切

答蔡廷彝

九月朔杭邸相聚惜無幾時念賢甥器識良可
遠到妙年便試此大邑適承頽敝之後又正是
盤錯時節今之所謂遠到者能文章取聲名作
好官取榮貴已焉矣今看文章與貴權畢竟於
心身上何所裨益惟吾甥試思之繁劇勞苦要
須有簡靜者爲之主一如明鏡何曾不鑑物鑑
而不留則身自不勞矣人能常清靜天地悉皆
歸况宰一邑乎學問只有一源無夷險靜鬧無
中夏無夷蠻無窮約無宦達若說忙裏廢工夫
然則閒時用甚工夫孔門學問是箇仁仁是箇
愛今爲民父母愛便是本中間抑強扶弱興利
除害大憲大辟皆自愛上推去勿作德念勿作
功念此便是學問今之爲吏者多行其意氣意
氣蒞事能有幾時意氣重在名則徇名重在利

則舍名而徇利意氣者害真之本也是以君子
貴知學惟吾甥珍重善夫力薄躬行徒有空言
敬爲吾甥盡之如何病中草草

答林茂貞

近拜名篇教言珍重林下諷詠真意何日忘之
善夫杜門已無復仕進之念才微命薄雖退處
閒廢尚恐不獲死所何幸今者再睹天日故雖
窮約得爲太平遺逸萬分俱足矣近林克相書
報吾茂貞中興一疏切中時政若一一依據而
行真足以復黃虞之治足驗吾兄所養之大索
居離羣時事多不及聞諫草幸寄下一紙以慰
岑寂至望至望吾兄日用更作何功夫廷尉事
得稍行所學否古人夷險靜鬧皆致力之地也
善夫比來精力覺得疲頓累鞭策不起日用驚
懼過此時節便是衰頹之境也有警語萬無惜
以次相聞慰慰伯固兄行草草未盡

與吳德翼歐陽崇道論恤典事宜

讀嘉靖維新錄竊想 新天子仁聖痛念海內

久罹毒苦而曰自今與民更始所以收天下之心者何物財者民之心也曰十五年以前盡行蠲免又曰已徵在官者准作下年該納之數又曰嘉靖元年以十分爲率俱減五分伏玩 恤典是三年之內赦民財賦者半也何者十五年全免十六年全徵元年減半此恤典正意也全免之中有已徵者若不准作下年全徵之數未免是狡猾者稱幸也蓋以十五年民知有赦故狡猾之徒或徵而不納或納而不全或三分或七分今將十五年隨其已納多寡兌入下年全徵之數納三分者徵其七分納七分者徵其三分使其十五十六二年皆如元年民受五分之惠方稱 至意迺今當事者或以十四年以前俱有已徵與逋負者將准作下年該納之數一款一置弗論殊不知十四年以前民安知有赦夏楚之下其有逋負者豈得已哉 廟議此款甚有斟酌但曰已徵在官本指十五年也却不明言十五年准作下年之數本指十六年也又

不明言十六年此蓋一時言不盡意處致使當
事者疑似遷就不卽將順其美近者全徵之命
或者上傷 聖天子之仁下傷萬民之心乎且
僕聞之君子貴從厚有此 聖天子在上切切
求治正吾輩行志達道時節縱有 聖意未及
處就如長孺之發粟亦得而行之况恤典顯然
如是乃以文法疑似之際反使民重困乎若以
處置軍儲爲計二年之內尚有五分之徵倘以
諸色已徵未解者奏補亦何不可只據一項掣
過餘鹽歲可八九千以補軍儲亦何不得竊以
全徵之意豈不以進貴之變乎進貴之變其旨
未全在軍儲向與見素公反覆極論致亂之由
有數端焉必不得已而去於斯二者何先曰去
食食盡去而民不亂其本謂何若以三月失糧
便足致亂則三邊健兒當先變矣三邊之卒至
有三年無食云何不變况八閩軍士征戰日少
且有生涯若處置得宜雖逋之十年保無變也
今但談虎變色而不探其致亂之本僕恐全徵

之事舉行不但傷萬民之心也昔 孝廟朝有君無臣憂世者傷之 今天子仁聖正賴諸賢翊贊將順共成雍熙之治千載一時也首先一事便使朝廷失信於天下僕恐有志之士不能無致憾如 孝廟時也僕自還山已分填委溝壑何幸復睹 明世有所見聞敢不爲知己者盡之倘賜采行不勝幸甚

與歐陽崇道

徵糧事宜使君處置甚停當十六年今竟全徵乎下民洶洶又聞十一年以前蠲除者今欲悉徵之果爾善夫有蹈東海死矣如朝廷天下何士君子窮居讀聖賢書便說欲兼濟天下及旣得志爲富貴所乘便諉之曰時不可爲今上有聖天子大賚四海吾輩時命旣得何爲而不獲一無所諉乃故爲拂戾以行其血氣柰何柰何使君何等人品何等力量部下之民皆使君兒女也陽城政拙至今照耀人耳目大丈夫當立名萬古眼前得失不足視也非托至知不敢如

此直率幸亮之里役事近聞奸宄往往漁獵嚇
錢此事恐須冊定後面定庶杜此弊水利呈敬
再上

答歐陽崇道

手教云云使君爲百姓之心極盛矣縣家誠不
知使君至意知人任使最難今百姓戴使君真
過是父母故愛之無不至慮之無不深每使君
行一好事惟恐其不勝復恐其未終竟以去也
真切真切并圖水利二事蒙行縣俱未發出萬
乞利導之倘有來言不便者皆私意也秋糧事
百姓未得明降日受縣杖併猶豫如有所待又
以十五年全納者十六年分一納在官倘准下
年之數決無退還之理公議作何處分使君曷
不揭一榜明開緣由以喻之民惟待使君一言
僕不欺也懷安雖稍完民其無如矣使君試聞
其怨懟之聲何如今之能官古之何如也饒舌
饒舌

與宗道

客夏拜篇翰情誼深厚至今在心膂旋有報書
山林况味大槩具陳矣世道嚮明賢人君子以
次在位喜慰何可言善夫自揣不肖寔未足爲
世用獨守愚拙甚安也或者又以善夫尚掛名
仕籍遭值 聖明乃似進非進似退非退經年
閉門不無疑於終南之捷者善夫立脚未穩亦
不能不動心於或者之云今自度旣非用世物
料只是求一明白使得一意山林讀書談學教
授子弟名教內當做事尚多功名事業莫須有
宿緣在善夫覺得無此分命也惟執事實知之
何以教我瞻佇瞻佇鄭鹿門劉函山正欲作書
素翁行迫不及也致此意至願至願

與平厓

未入道以前連得詞翰邇來所養益深矣繼得
上執政書一切中興漏略處此後經綸可占
也久不見報近送素翁至西禪得閱新政數大
事人恒言山林草野之士嘗過憂易曰履霜堅
冰至春秋防微杜漸謹之於始詩靡不有初鮮

克有終古聖人之意深矣深矣善夫江湖丘壑望治之念如執熱者欲濯清風極真極切苟得小康雖終身爲逸民死甚樂也素翁行當又爲世道一卜吾兄身居言責凡平日所講明所欲言請先舉其大者要者不特職分內事三十是立脚田地四十是不惑田地七尺之軀寸寸是可愛惜者既不爲利害所軋此外無足慮者萬萬爲天下珍重切望切望素翁行迫匆匆寄囑不及起居

與歐陽崇道

善夫啓西禪幸再挹尊範江湖耿耿所欲言未得從容盡爲知己者一發愧負愧負水利事深欲畱念曩時向執事陳說此事只爲一郡民便熟計執事斷能信而行之也不意一落縣家遂如石沉水就僕一里再三陳懇竟不得遣官一視遂使執事美政頓成虛文矣今齋上批結一紙求覽若如此發行執事以爲行得否也僕亦知郡邑公務實繁瑣視此等事真若迂遠不切

時務然召信臣守南陽民呼爲召父史只稱其
勸農桑開溝瀆起堤闕晦翁提舉浙東歷窮山
長谷鈞訪民隱首治四明黃岩涇堰以爲民本
蓋民無食設訐盜賊皆自此起究竟此事雖今
之迂遠實古之切務也僕誠不以今之能吏待
執事猥辱知待遂首有此獻又私計晦翁是舉
請給公帑動數萬貫今此又百姓自爲特假上
人威權以齊一其力耳較前款若易易也一落
縣家反若是之難日今暇時已過農務將起想
成罷休矣水利與併圖二事本是深耕薄斂表
德王政至要也近聞併圖事亦委之縣家徑申
僕恐又成畫餅矣行此等事下民雖云至願至
便然安習困苦寧是坐以待斃實不知出脫之
方只在在上者指其迷而利導之譬如黃口赤
子困疴瘵但知啼號而已豈能理會其病源所
在而求以抹瘵之耶今願執事視部下百姓卽
如赤子一般看聽其啼號之聲充其惻隱之心
則所以按其病而投其藥者自不能已矣藥之

不愈顧且日夜旁皇遍求明劑決不坐待其斃也此實七情之正中發出性分內事也僕自病歸無所與於世事迺有芻蕘之論懇迫於執事實以執事志行相同自量言之必猶出諸執事之心也隔面怵怵不勝勤綷萬惟終鑒在部下幸甚

三與平厓

素翁行後再發一啓專爲素翁議廟號事大臣以道事君不合則去素翁一出只以成事不合以去天下其謂何若不合而不去自處其謂何今世道雖有太平之望然天下人心望治之機譬如隻力挽陷車之輪纔轉動依然復故處也且看近來一二事識者已占其未然矣大抵天下事多是吾輩自壞三代以還其人才氣數乃縣絕如此可嘆可嘆厓老近來有建白否治天下有本議天下事有要今上聖明要在親賢士養德性經筵進講亦不在多言只把大學中庸誠意誠身上着實開說務在躬行要見二帝

三王盛德大業皆由此進日養夕息自然充拓
光大聖德一固凡百機務自此中推出決無悖
謬矣凡人氣質不大相遠今世學術不明槩用
其氣質變小人爲君子變君子爲小人只是箇
風之化公看劉瑾時多少才雋皆受變一番
孝廟朝亦卽是此人才非天又別生一番人也
此豈不是風之化厓老在言路要只去其太甚
者微瑕寸朽值此 聖明要皆可化爲忠以贖
前過如何如何走蠢拙無比近來意向在行止
之間元無拘着飲水食粥中不惡也順報便人
去迫信筆云云百惟爲道自愛

會湛甘泉

近拜韶州手翰并大學中庸測古小學訓規連
日披誦吾兄之冲養深矣善夫無大器局天機
甚淺竊有志於是氣力卑弱而舉千鈞未見其
勝者幸藉師友夾持至此今又去之窮海之濱
閉門靜求尚覺或存或亾日用驚惕實未能伏
得此心安帖乃今始知聖學之若是艱也向與

應黃二子期到西樵後二子不果來聞自擬是
春獨往今又不果矣近得宗賢與守中書備述
陽明先生有玉成至意實切摳趨但以出處未
甚分明故遲遲矣大抵是向道之念未有如好
好色惡惡臭之真也素翁正月離省下聞中途
尚有辭本尊翰今附去人早晚想聚京師也叔
賢近况若何敬問百惟爲道自愛不宣

答石龍

自東陽一書後再不聞消息前素翁去匆卒草
草數字相聞而已不知何時到京師吏曹以何
地相處爾今上冲年百無玩好一味恭默誠
堯舜之資也今日所急者知學之臣以講明古
帝王執中之傳使聖德日新月盛然後可以
責成黃虞之治耳今日四方徵召多是丘林冲
養君子今日所闕又非尋常百執事如先生者
直宜以論思之地勿泥常格更得一二元臣
鼓動其間使舉朝皆相信附使有道君子得安
其位行其志積之歲年不患先王至治不見於

今日也素翁去意却欲徐徐或者多以為君命
召不俟駕竊想素翁意思正以近世大臣去就
太輕故所就亦多苟且故堅卧而強起強起而
濡滯者且審人主注用之果如何耳此老若當
軸直是要幹古人事業實大難得甘泉兄過韶
有手書并諸新得見寄連日閱過儘多啓發處
此時想聚論東師有不一處幸與商量務歸大
同至慰至慰南洲兄起否久不相聞矣前領東
陽至意平日所學何事得時行志吾輩一大心
事然君子蓋有自處者走不為自便也未面埃
再詳

與應南洲兄

久闕聲問矣聞石龍竹江俱已就道甘泉此時
亦已抵京不知兄何日出門也先朝廢置者率
已登用諸賢一時同朝實太平之一大機會也
竊以興致太平自有先後緩急之序要須識得
小貞大貞之理自古君子在位能有幾時往往
為喜名好事者將好機會失却兄見林茂貞應

詔一本否議論得極正大處置得極縝密但其
言語太峻急無涵蓄後來遂生出許多支節不
相下氣只就君子一邊便不能得其同心共濟
矣吾鄙最患是分鄙相治則凡乘間而伺吾之
隙者何所不至此事稍覺轉動良可深慮兄其
體念之近得甘泉兄訓規大學中庸測分析條
件覺得窒塞費氣力相見幸與明辯之善夫識
淺近答書未敢論也

上孫九峰大司徒

善夫癸酉秋獲送道旌南歸旋以疾去之海上
侍履無由每瞻嵩南九峰鬱鬱而朝廷之柱石
在焉自我公去國十年而十年內之風物氣象
何如也 今上聖明應運御天而我公實起而
輔之是今日 聖君賢相一時同潛于襄漢之
表今日飛龍在天而應之者固宜有九二見龍
之大人也於乎不圖漢唐宋而後復見堯舜爲
君臯夔爲臣而同廷合席也蒼生世道何其大
幸哉公之一出一處實 朝廷安危之係天下

治亂之準也信非以一節自止者可比方其萬一也今日幹轉元化整齊綱紀非公其誰也先朝之弊甚矣今者其後甲三日也一動移間就可黃虞其天下使萬物各得其所願良在此一大機會中萬萬不可失也善夫疎凡迂拙自知當齟齬一世謬充我公昔日藥籠中下品在教養徐議之列銘深肺膂奉違十載中間稍出爲先人贈典隨衆獲罪以不死餘軀復解去草野荒落竟不能時達其私情隆想天人愧負門下多矣遭際明時正好執鞭爲大君子御又以病居不得聆馨欵於萬一情其謂何昔溫公謂元城先生曰知所以相薦否曰獲從公遊舊矣曰非也光居閒足下時節問訊不絕光位政府足下獨無書此光所以相薦也善夫於公視元城於溫公迹實相反敢自避其斧鉞之誅哉顧自原其望台之私實無間顯晦希曠之迹有難以言語自文者因吳德翼之便敬此布下悃伏望益爲天下加愛不宣

畜楊叔亨

宗道至始得吾叔亨動定云各係公事亦不頻相見日來切磋何人詞藻之學視往日較不動意否恨團聚日淺猥辱相與至意實未有毫分裨益愧負可言容色音問之闊又將三載矣善夫此歸只爲求所以立者閒居靜守追其病痛所在日用應接爲所障礙處甚多不見長進計今犬馬之齒去四五十直咫尺間耳因念入仕將廿載分內事未有一件成就此身負陶鑄多矣周勤可所附來書是今日到拜教拜教前寄去口義多出一時應畜不足觀近稍看過儘有未更定處累欲抄去求吾叔亨評改且未能述而自歸以後無有從講者未會上紙大抵四子六籍只是一致但尋得源頭分曉萬軸破竹矣口義元不爲著述第使聽者備不忘耳大學明德中庸性道教作何理會若苦去書本上搜求該博一旦年力衰莫却於何處安泊易理近頗見得幾分比舊說較闊大未敢謂斷然是如此

行將與吾叔亨面論之春秋元是舉業上功夫
今幸已不記憶大段彷彿得聖人意思未暇攻
矣象山語錄大槩在鳴冤錄今人學象山如鳴
冤之名可作口實耳古聖賢立言只是發明這
一件事若讀書得法更不消許多朱子精義象
山廣大俱不外此學者只管較量朱陸同異恐
反被異端揶揄也吳德翼去促草率布此德敷
克相俱無書幸引賤名

與思道

自去夏拜緘後續奉三狀不知盡得達否倉忽
爲別又是幾番物候耳日月如流吾二人者皆
是四十左右不知更有四十年於世更得幾番
離合也學問未成事業未建善夫此身愧負於
君父朋友多矣今雖處散地畢竟吾輩平生所
講明何事及時致用自是明體者所不忍失善
夫庸劣迂拙兄實知之其平生自揣實不敢過
望其所以自待亦不忍自薄得一僻邑而治之
鞭策驚蹇日不越百里容或有濟顧此官階似

非可下而出宰者當此 聖明善夫顧矯而爲
高耶近士夫中多勸善夫可速出善夫私念出
處決不可輕窮達斷自有命前此僕僕道途旅
進旅退於君親上未補毫分而身心所失奚止
尋丈倘不我錄顧當安諸命焉已矣惟兄其教
之吳德翼謂必致書山東燈下草草

畚歐陽崇道

承下問求民安瘼之念藹然可掬以公之賢明
進無似於忘形之地善夫顧忍隱情惜已自同
寒蟬耶坊里事據善夫耳目所及儘見公溥寄
報職役人戶者改正甚多百姓至愚而至神孳
孳求奸反受其焚看來百姓儘爲恩威所囿轉
移之速而不忍欺不敢欺者又在於揭日月之
外也慰慰其首報未盡者又聞開自新之路其
一二未平者又聞開自直之門可謂盡其情平
其政矣但鏤版一事善夫敢盡其愚人情彼此
勢均收除之際於升合計便宜自有許多難處
處里里如此草冊甚至有抄舊管者非其緩急

得已之罪也聽審間第不失以正對耳若一一
刻定百姓十年受其縣拏勢必至於更易更易
一多公忍盡誅之耶其法只在於部省府縣四
冊一時俱了則自無弊矣鄙見如此望惟高明
更裁之山林迂腐恐不足以窺公妙用未敢便
以爲是也

答王應時

承手教繆繆至意深悉別後動定執事行益高
學益邃而取善益廣善夫不及也天下多故則
小人攻君子及稍無事則君子自相攻天下事
最患是分鄙旣已分鄙决無有相成於是非之
同以共濟天下者是國家之大疾也執事其念
之善夫久居荒寂日思海內故人各有所長皆
是善夫師表追憶教言恨不得縮地未止是聞
足音而喜也出山尚未有期奉晤無時幸爲道
自愛以慰遐念

答張昆侖

平厓歸領教言且詢動止吾子以宏博之才加

以恒嵩河漢之助弘大幽邃無不有之矣善夫
入山日深矣何日得與吾子共談天地古今之
變以究出世之論也馬江二子復得合并知吾
子甚樂也夢澤竟遭此摧抑過剛則折吾輩亦
當自尤也聞擁車者通州足以見夢澤之素矣
閩浙之行莫是謾語否待待太初稟奉去此走
批點者此刻出之徽人徽人好事而畏禍多將
原題易以己名又將涉時事者削去可恨可恨
今此盡行塗去更有潯陽歌十首在汪希周處
取入之煩再刪過看與鄙意同否至望所惠書
甚佳拜祝拜祝

上陽明先生

善夫蒙天不棄癸酉歲得假毘陵之謁猥承至
教柰以天質凡下無有其地因循歲年幸再私
淑諸人稍知向道是雖未及先生之門然竊念
先生之恩信與生我者同死不忘也第恨立志
不堅時作時輟比來業不加修病不加少恐一
旦卽死與草木同朽不及終志門下不無負無

涯之憾矣去秋擬出門再沮於大病至今未復
區區樞趨寸忱未有一日放下也子莘往敬布
下意萬冀不棄絕於門下不勝幸甚

答張起溟

適作書寄去程丞且至彼此相念一而已矣讀
教札悉公已造高明地位生此天地得爲人爲
男子復備此聰明不求實作用以了此生良負
覆載學問無處非致力之地所謂厭喧就寂避
繁入簡去富貴以樂貧賤舍山林以混市朝凡
有意必皆非也公根器大佳求所以安身立命
處甚無難事辭章技能奚啻笥屨也善夫資稟
駁雜鞭策不起無以會知己秋冬不免一出隨
世遷就非其志也承委作尊翁壽文於公有愛
哉善夫自永感後不忍作此項文字今敬爲樗
翁傳如何文思蹇澁亦須旬月可辦當有以復
也未盡

與朱白浦

近聞兄出視齊魯歲裏一啓恐不及矣平厓此

行與兄同地凡百敷張自身而推者日與講明沛然中正矣喜慰喜慰善夫自得杭州書旋得南洲石龍二械承三兄誨掖深恩何可喻之去秋滿擬弔楓山卽謁陽明奈瘡疾纏糾至仲冬百病增劇今五閱月矣尚面無人色精神血氣不及往時多矣近與平厓訂約異日過魯謁孔林當移兄爲會以罄所未言功名之論最其後者聞子積子謙小野皆坐誦其有以取之耶惜哉惜哉寓岳上布此不

與陳天游方伯

善夫寡劣幽塞行不逮志百無及於人人謬承君子過與不在遐斥之別乃不獲領光霽於磬欵之下以增未能豈所謂入山含玉入海而不探珠耶良愧良愧善夫自去冬病厄至今形骸盡死所餘者殘喘耳功名事恐非樵牧之徒可以倖取近蒙有勸駕之命中賜過揚反身自觀豈勝皇汗且自揆才力實不堪事事兼以平生數竒百病相代自分得穩臥於聖明之世數

年以死萬念俱足矣善夫何德以承君子之辱
昔陳仲舉薦徐穉穉雖不出感念深矣病未愈
莫拜堂下敬以狀致悃唯營其所存幸甚

答季明德

春間得見懷之作備聞起居緬惟草堂促席話
言常在懷抱也此時官理想得行所學學官一
而已近見時禁所指將有紹興慶元之憂人心
世事乃如此諒真見道君子必不爲所變也此
道在天地更有何同異諸君子莫是血氣異之
也血氣愈用去道愈遠矣可嘆可嘆善夫自冬
徂夏純在病中今雖去體然疴憊甚矣餘情甚
長埃相見日盡之未一一

答魏子才

近南海李令書來始訪取得手教并三訓規服
玩不丟手敬拜嘉言承發示三端其提掇之意
深美深矣善夫謙劣少不聞至教沉溷文字伏
匿空虛者殆十許年中賴朋友相麗稍因此中
有未見然志不堅忍依違汨沒又將十許年今

髮已種種矣自視實未有毫分植立好善不如好好色惡惡不如惡惡臭卽是無實知見故無此真好惡日用夾雜者又何限日唯驚惕將終爲小人之歸矣此不敢自欺不敢欺人承諄諄至意實未有以畜君子之辱也鶴峰在此頗獲相觀樞侍何時天向肅惟君子體之不宣

與應南洲

春間得越中二手教繼得顯仁濟上種痘事近又得二兄宦蹟皆好音也善夫人秋病稍去體

然神思大減眼就花齒半搖動百年未中而衰颯如此不肖可言耶白下之命於病軀散才甚稱且得以暇日求吾斯未信處竊自慰也石龍兄此時想履任相聚之喜良莫可喻兄在京師近况何如閱邸報氣象甚見逼促今日須得一二元老休休有容兼收並蓄化小人爲君子勿太黑白使此輩不自安漸漸整頓將去或有可望士大夫誰非可用之材今日用人只是不當位故俱不得其効處欲言甚多相見在何時勞

心忉忉

與林平厓

宗文知未回平厓序容另寄林廷光歲裏到徐不敢前進今復送家小回世事可知走踪跡只在西湖之間矣

鄭少谷先生全集卷二十一

鄭少谷先生全集卷之二十一

閩中鄭善夫繼之著
後學邵捷春肇復訂

論著

易論

伏羲仰觀象于天俯觀法于地中觀人物真見得陽是實陰是虛故陽一畫中實陰二畫中虛乃見得天有日月之顛是陽畫中自有陰陽地有山川之顛是陰畫中亦自有陰陽日月山川

之中復自有陰陽陰陽相生八卦成象衍爲六十四卦天下萬有之理畢而無餘矣

夫君子以趨吉避凶防微杜漸易其聖人至教也故曰君子用之小人勿用如姤之時五陽在上一陰在下小人雖微將盛之機也然其道未成其勢易剪時則必去之而後已杜其漸也至於二陰在下其惡已遂其勢已成在君子則有遁遁之時不可爲也猶可去也至於三陰在下天地不交否之時君子將何逃乎亦惟守處善道完其志以俟命於天矣蓋聖人可完名則完其名可完身則完其身遇否則完其志而已如一陰在上五陽在下小人尊而無權君子盛而有助剪之易易矣五王不去武三思自爲枕上之肉蓋不明於易之義矣

堯舜最善用易堯舜盡聖人之權者也自羲皇以來相傳至堯舜物極必反之時也故丹朱商均皆不肖焉堯能祈天永命卽禪之舜舜復能祈天永命卽禪之禹以濟其否是分明奪天地

造化而反之正者也故曰聖人贊天地之化育
世道治常少亂常多謂何陽只一陰便有二五
行之清氣本少濁氣本多今看一世天地山川
之氣生才賢能有幾何顧是困知勉行成功則
一人只是不學大抵是稟得精粹之人絕少也
靜則觀其象而玩其辭象乾象也辭元亨利貞
也動則觀其變而玩其占變變乾也占元亨利
貞也

邵子曰至哉文王之易其得天地之用乎故乾
坤交而泰坎離交而既濟也乾生於子坤生於
午坎終於寅離終於申應天之時也置乾於西
北退坤於西南長子用事而長女代母坎離得
位而兌艮爲耦應地之方也

震艮坎三男乃坤求乾各得一陽而成本皆坤
體故多陰兌離巽三女乃乾求坤各得一陰而
成本皆乾體故多陽

乾下交坤於子坤上交乾於午是各反其所繇
生也故再變爲後天卦則乾退西北坤退西南

不用震代父始事而發生於東方巽代母繼事而長養於東南也東者離之本位繇上而交坎於西再變為後天則退得乾位西者坎之本位繇下而交離於東再變為後天則退得坤位而少女兌少男艮為耦繇先天而後天此文王之易所以得天地之用也

乾父也坤母也震長男也巽長女也坎中男也離中女也艮少男也兌少女也先天主乾父後天主震子統天莫如乾父主宰莫如長子羲文

作易惟一陰陽也

天一生水地六成之地二生火天七成之天

三生水地八成之地四生

金天九成之天五生土地

十成之

北坎得一六水南離得二


七火東震東南巽得三八

木西北乾西兌得四九金


西南坤東北艮得五十土此後天

八卦之合于河圖也

後天八卦合圖



先天八卦合圖



一太陽口位也六為太陰之數居之二少陰
 二位也七為少陽之數居
 之三少陽二位也八為少
 陰之數居之四太陰二位
 也九為太陽之數居之
 乾兌得太陽之四九離震
 得少陰之三三八巽坎得少
 陽之二七坤艮得太陰之一六此先天八卦
 之合於洛書也

河圖之數一六二七三
 八四九五十相承者陰
 儀陽儀太極也主順行相生一六水生三八木
 三八木生二七火二七火生中央五十土五十
 土生四九金四九金生六一水
 洛書之數中五者參天兩地也戴九履一左三
 右七者陽數居四正也二四為肩六八為足者
 陰數居四隅也主逆行相尅一六水尅二七火
 二七火尅四九金四九金尅三八木三八木尅
 中央五十土五十土尅一六水

大過 恒 巽 井 蠱 升 訟 困 泰 解 渙 坎 蒙 即 遯 咸 旅 益 比 過 漸 蹇 艮 謙 否 萃 晉 豫 觀 剝 坤



坤 艮 坎 巽


大陰 少陽

陰

極

卦十六卦生
三十二卦三
十二卦生六
十四卦

姤 復 頤 屯 震 噬 隨 无妄 巽 賁 既濟 蒙 豐 離 革 同人 臨 損 節 寧 歸 睽 兌 履 泰 大畜 需 小畜 大壯 大有 夬 乾




震 離 兌 乾

少陰 大陽

太

太極生兩儀
兩儀生四象
四象生八卦
八卦生十六



此伏羲先天之圖
以形體言乾坤縱
六子橫對待之易
之體也
乾天坤地定位良
山兌澤通氣震雷
巽風相薄坎水離
火不相射不相射
者水相濟不相射
害也邵子以乾為
太陽兌為太陰離
為少陽震為少陰
四卦自陽儀中來
為天四象巽為少
剛坎為少柔艮為
太剛坤為太柔四
卦自陰儀中來為
地四象

干支配五行
甲乙木丙丁火戊
巳土庚辛金壬癸
水
寅卯木巳午火申
酉金亥子水土寄
於辰戌丑未之月
之方

離 ☲
丙午子

戊巳土旺於中
季之中每季十
八日季夏九旺
天生土也寄於
辰戌丑未之月方

坎 ☵
壬癸

震 ☳
甲卯乙

巽 ☴
丙丁

坤 ☷
庚辛

兌 ☱
壬癸

艮 ☶
丙丁

此文王後天之圖以氣言坎離縱六卦橫流行之易易之用也

帝出乎震震東方雷動萬物萬物出也齊乎巽巽東南風撓萬物萬物齊也相見乎離離南方火燥萬物萬物皆相見也致役乎坤地也萬物致養焉說言乎兌兌正秋也澤說萬物萬物咸說焉戰乎乾乾西北陰陽相薄也勞乎坎坎北方水潤萬物萬物歸之成言乎艮艮東北也萬物成始成終也

洪範論

洛書之圖戴九履一左三右七二四爲肩六八爲足中央之五謂之皇極天三地二圓故三方故二合而爲五也一五生三故四方四維其數皆十五也

天一生水地六成之地二生火天七成之天三生木地八成之地四生金天九成之天五生土地十成之此以才質言也若論五行則天初生水五行具矣生火者凡有開明處卽火也

天一三五七九則五爲中地二四六八十則六爲中地不言十者十卽一之變也故洛書用九一各以三乘之積八十一則六千五百六十一之數具矣

九九圓數配一年八節冬至在九九一一之間所以黃鍾之宮爲中聲蓋陰陽始終合尖之處也二二立春三三春分四四立夏五五夏至六六立秋七七秋分八八立冬猶天左旋是以日行黃道二十八宿纏次皆因之與易負圖相顛

易始一陽來復卽九九一一之間也始震而離而兌而乾畫卦自乾至震今自震起所謂數往者順也繇乾而巽而坎而艮而坤畫卦自巽而坤所謂知來者逆也

洪範方數與易方圖亦相顛皆陽起西北陰盡東南也

太玄八十一字前輩皆無解看來只是明時以七十二候分配八十一圖之中如潛次原守次守直次信之顛而以墮終終之亦猶孔

子序卦之意也理數象微之起也理氣形微之顯也理數微於象理氣微於形數生知所來死知所去者數之終始

蔡子曰陰陽五行其體而用用而休者耶渾渾淪淪而出入異門繩繩井井而形色具泯合之而異析之而同微之而顯克之而不窮乎變化者陰陽之屈伸消長也非二則不能久非一則不能神一者形氣之元也極也極無不中也一藏於二二藏於萬形氣則有偏也此所以有善惡得失之分吉凶禍福之著也

河圖體圓而用方聖人以之畫卦洛書體方而用圓聖人以之叙疇卦者陰陽之象也疇者五行之數也象非耦不立數非奇不行奇耦之分象數之始也大玄以奇爲象經世以耦爲數多窒而難通矣

象以耦爲用也有應則吉數以奇爲用也有對則吉象者靜而之動也數者動而之靜也成象者陽也成性者陰也陽者數之生陰者象

之成陽以三至陰以倍乘生生不窮各以序升
人身順性命之理也一爲水而腎其德智也二
爲火而心禮也三爲水而肝仁也四爲金而肺
義也五爲土而脾信也

順數知物之所以始逆數知物之所以終數物
非二體始終非二致

洛書數九而用十何也十數之成也數成而五
行備也數非九不生非十不成九以通之十以
節之九者變通之機十者五行之叙也方隅對
待中五含而十數已具於九數之中矣以見圖
書之相爲經緯也

朱子曰天數中於五地數中於六天有陰陽故
二其五爲一十合三與七一與九亦十也地有
柔剛故二其六爲十二合四與八二與十亦十
二也十爲干十二爲支十干者五行有陰陽也
十二支者六氣有剛柔也五行六氣實一氣也
五行在天爲五氣雨暘燠寒風也在地爲五質
水火金木土也天五氣雨暘質也地五質水火

氣也天交於地而雨暘爲質地交於天而水火爲氣變者陰陽之正也三不變者陰陽之雜也

洪範九疇解

洪大也範法也疇類也言治天下大法有九類也

一曰五行金木水火土此天之氣行於地者也

二曰五事言貌視聽思此天地氣質異於人也

三曰農用八政食貨祀司空司徒司寇賓師農

阜也

四曰協用五紀歲月日星辰曆數

協合也

日行不及天一度月行不及天十三度天無

體以二十八宿爲體日每至三十日不及天

三十度月來會其下則月體無光故謂之晦

朔蘇也月遲則漸有光故謂之朔每年會十

二次會處謂之辰無星處爲辰日晦十二辰

十月晦在寅十一月晦在丑之類

五日皇建其有極

皇極大而君臣父子小而事物細微皆是

六曰又用三德正直剛克柔克

又治也

七曰明用稽疑明辨也

兆爲雨霽蒙驛克

卦有貞悔貞事之始悔事之終陰陽皆少而有動則內卦爲貞外卦爲悔陰陽或老而有動則以遇卦爲貞之卦爲悔

八曰念用庶徵雨暘燠寒風五氣有時不時爲休咎也

九曰嚮用五福威用六極 嚮向也威畏也

五福壽富康寧攸好德考終命六極凶短折疾憂貧惡弱

九九相乘成八十一數共六千五百六十一

一一至一九 一一冬至 二一至二九

二一至二九 二二立春

三一至三九 三三春分

四一至四九 四四立夏

五一至五九 五五夏至

六一至六九 六六立秋

七一至七九 七七秋分

八一至八九 八八立冬

九一至九九

數始於一參於三成於八十一備於六千五百六十一數之大成也

一數之周一歲之運也九數之重八節之分也一一陽之始五五陰之萌三三陽之中七七陰之中二二陽之長四四陽之壯五則陽極矣六六陰之長八八陰之壯九則陰極矣一九首尾爲一者一歲首尾於冬至也此蔡子準洛書之象起數也

大數猶卦也小數猶爻也大小數之中各有大小數如大數一之一上一一大數下一小數也小數亦然從卦數起爻數得時皆從吉字起以下圖加於上圖之上卦大數左而直卦小數右而橫如一之一上一字管小數之左一至九皆直看下一字管小數之右一至九皆橫看填吉凶災祥餘以顛推五數不同自五一至五九左皆平者大數五字管攝之五得數之中也右同前惟五之五不同大小數皆得數之中也左直既

平矣右橫如一吉則化九凶三祥則化七灾八
休則化二咎六悔則化四吝而爲平也

洪範數補敘

範數也數者理之具也時之因也繫之辭焉所
以告也定之吉凶所以斷也九疇者總其綱也
九九者衍也六千五百六十一者數不可窮也
八節之分也七十二候之備也歲之終始也陰
陽之迭運也年月日時者而各專其用也餘而
也吉凶灾祥休咎悔吝平者緘其變也所

易有八卦九疇之符也九九者六
者比其體也數者效乎爻也釋辭
也者極于精不可窮者通乎變不

可
者妙乎神廣大悉備引伸觸長天下之能
事畢矣蓋所以因貳而濟民行也易更四聖而
之數待九峰而著然釋數之詞缺而弗脩
蓋開端而不竟余生後四百餘載貫于歲月乃
率辭揆方僭叙所得用蓋其缺辭盡而理無涯
數定而意也不可語神而明之默而成之惟無

沈心者得之嗚呼易傳而範不傳天地之數久
藏其秘道蓋未昭也千古一心其有來世之俟
焉

序數傳

二至者一歲之樞紐陰陽之肇也萬物原於陽
而終於陰冬至陽生萬物之原故原數始焉夫
物之始其潛于下故受之以潛陽乃曰潛氣漸
以漸長也潛藏也不可守故受之
以守守不可不信故受之以信信者實也所守

直則陷於偏邪故受之以直過直則
故受之以蒙蒙者物之穉也穉物所當閑故
受之以閑閑闌也闌物必有所欲故受之以須
須者須所所欲也過欲必危故受之以厲知危
懼則有成故受之以成物成而動故受之以冲
冲動也動必振于外故受之以振振者奮也奮
振必有求故受之以祈祈求也所求不可越其
常故受之以常常者所當順也故受之以柔柔
順也順常則不爲苟難故受之以易平易近人

然後可親故受之以親親者歡以相愛也相愛必文以相接故受之以華華文也文著見故受之以見既見則天下文明道無不獲故受之以獲獲者得也得人以相從故受之以從從則有交之道焉故受之以交既交必育故受之以育育長也既長必壯故受之以壯物壯而興故受之以興興起也物興起而欣欣然故受之以欣欣者情必舒故受之以舒舒徐也叙也叙必相比故受之以比物不可久比故受之以開既比

晉故受之以晉晉進也進不苟故受

一一者益也故受之以益益而後

故受之以章章明也明則益以盈故受之以克克滿也克滿不可以自私故受之以錫錫予也益以錫予則人心靡然故受之以靡靡偃也人心偃靡所徒者衆故受之以庶庶不決則黨故受之以決衆決則悅故受之以豫豫悅樂也悅樂而升故受之以升升者進于上也陽之極也陽極于上無不中也陽已極而陰萌焉夏至

時之中也故受之以中過中陰之伏也故受之以伏陰而曰伏氣漸于終道將否也伏匿也匿必有過故受之以過過愆也愆過則疑故受之以疑疑則失衆故受之以寡寡過則闇而曰章章飾也故受之以飾飾文也文過必自戾故受之以戾戾必不情故受之以虛理虛則昧故受之以昧昧則有損故受之以損損過以用中故受之以用過用則退故受之以却却者退也退不可

故受之以翕翕聚也聚以致遠故

受之以不可不奮故受之以迅迅於遠不可不懼故受之以懼有懼必當去故受之以除除必弱故受之以弱弱者氣失其平故受之以疾疾之不已必爭故受之以競競則必分故受之以分分而失均則必訟故受之以訟訟不可長故受之以收收斂也物斂則就實故受之以實實者誠也誠則能以禮下人故受之以賓賓而弗穆必危故受之以危危者自高而懼也懼危則自堅故受之以堅堅剛也金剛則革

故受之以葦葦以通天下之利故受之以報報者禮也禮必有所止故受之以止止亂莫如戎故受之以戎起戎者怨之結也故受之以結結聚也聚必有養故受之以養養以致用故受之以遇遇合也合而必勝故受之以勝勝者俘其囚也故受之以囚囚敵則能任故受之以壬壬任也水居萬物之歸陰之極也陰極而固也故受之以固久固必遷故受之以遷遷墮故受之以墮墮復于下冬至之半歲之終也故受之以終焉蓋始終一歲之成也

田制論

賦稅之法所以出財以供國用也賦者所以給車馬兵甲士徒賜予也稅者所以供郊廟社稷奉養祿食也十一而征則其供也易征及商賈與虞衡者抑浮食也宅不毛出里布地不耕出屋粟人無職事出夫稅家稅者罪其惰也歲役不過三日者愛其力也

禹畫九州制五服任土作貢畿內五百里田甸

服外五百里曰侯服外五百里曰綬服外五百里曰要服外五百里曰荒服

殷分百里內曰畿以供官千里內曰甸以爲御千里外曰流設方伯以爲屬公田藉而不稅七中而助

周分九畿方千里曰王畿外曰侯畿貢祀物又外曰甸貢嬪物又外曰男畿貢器物又外曰采畿貢服物又外曰衛畿貢財物又外曰蠻畿曰夷畿要服也貢貨物又外曰鎮畿曰藩畿荒

服也一見貢寶玉

周制任事有等任農以耕事貢九穀任圃以樹事貢草木任工以飭財事貢器物任商以市事貢貨賄任牧以畜事貢鳥獸任嬪以女事貢布帛任虞以山事任衛以澤事各貢其物 又因其比隣以五人爲伍五伍爲兩四兩爲卒五卒爲旅五旅爲師五師爲軍以起軍旅以作田役任土所以紀地宜也分五服設九畿所以別遠近也爲伍所以知衆寡也因井廬以定賦稅農

圃工商牧嬪虞衡之人皆因其所工不求其所拙也履畝于紀魯畝者履畝而稅也宣公無恩信於民民不助力於公田故履畝按行擇其善者稅之谷梁曰私田稼不善則非吏公田稼不善則非民稅畝雖十一悉其民矣

魯成作丘甲者使丘出甲也周禮九夫爲井四井爲邑四邑爲丘丘十六井出戎馬一匹牛三頭四丘爲甸甸六十四井出長轂一乘戎馬四疋牛十二頭甲士三人步卒七十二人此甸所

賦成公使丘出之重歛也

魯哀用田賦者一井之田歛其財物也言用田賦者若漢家歛民錢以田爲率矣公田不過十一軍賦十井不過一乘哀公外慕疆吳空盡國儲故復用田賦過什一矣

漢武置平糴立均輸起漕運興鹽鐵開鬻爵設權酷收筭緡納雜稅造錢幣雖經費獲湍民無聊矣散淳朴之風成貪叨之俗自此始矣

租庸調之法歲庸二十日旣免其役日收庸絹

戶丁一尺夫庸者猶古歲庸三日之名調戶丁
募倣井田調發兵車之名然去古遠矣租者蓋
屯田之法古者以逸制敵內無亡費之利外有
守禦之備自漢昭遣人屯田張掖之復趙充國
破先零屯浩亶鄧艾滅吳屯淮潁歷代因之皆
得其利今之屯田其名雖存其法盡廢守屯之
卒與農氓無異其官亦但知了賦稅而已更不
知屯以用兵一旦有寇與師費財屯田實無補
尺寸失古者屯田之意矣甚至爭民奪利祇爲
民害愚意屯田之法不復不如無屯

九章乘除法

乘者自尾而首歸
除者自首而尾

一曰方田以御田疇界域○二曰粟布以御
交質變易○三曰衰分以御貴賤廩稅○四
曰少廣以御積累方圓○五曰商功以御功
程積實○六曰均輸以御遠近勞費○七曰
盈朒以御隱雜互見○八曰方程以御錯揉
正負○九曰勾股以御高深廣遠

九歸法

一歸不須歸其法故不立○三歸二一添作

五逢二進一十逢四進二十逢六進三十逢八進四十○三歸

三一三十一三六十二逢三進一十逢六進二十逢

九進三十○四歸四一二十二四人遇一數每人得二十餘二未分

寄下 四二添作五四三七十二逢四進一十

逢八進二十○五歸五一陪作二五二陪作四五

三陪作六五四陪作八十逢五進一○六歸六一下加

四六二三十二六三添作五六四六十四六

五八十二逢六進一十逢二十二○七歸七一

下加三七二下加六七三四十二七四五十

五七五七十一七六八十四逢七進一十逢十

四進二十○八歸八一下加二八二下加四八三

下加六八四添作五八五六十二八六七十

四八七八十六逢八進一十逢十六○九歸

各隨身下加逢九進一十

問一萬二千三百四十五兩六錢七分八厘九

毫二人分之各得幾何答曰每人得六千一

百七十二兩八錢三分九厘四毫五絲二因

還原

問前數三人分之各得幾何答曰每人得四千一百一十五兩二錢二分六厘三毫三因還原

問前數四人分之各得幾何答曰每人得三千八十六兩四錢一分九厘七毫二絲五忽四

因還原

問前數五人分之各得幾何答曰每人得二千四百六十九兩一錢三分五厘七毫八絲五

因還原

問前數六人分之各得幾何答曰每人二千五十七兩六錢一分三厘一毫五絲六因還原
問前數七人分之各得幾何答曰每人一千七百六十三兩六錢六分八厘四毫不盡一絲不盡的不用因七因還原

問前數八人分之各得幾何答曰每人一千五百四十三兩二錢九厘八毫六絲不盡二忽八因還原

問前數九人分之各得幾何答曰每人一千三百七十一兩七錢四分二厘一毫九因還原

右乘除總式

問錢二萬五百二十文每米一石價四百五十文該米幾何答曰該米四十五石六斗

右粟布法

問四方田四面各一百二十六步為田幾何每

步六尺每畝二百四十方步

答曰得一萬五千八百七十

六步該六十二畝一分五厘

問畹田下周九十九步徑五十一步為田幾何

答曰周徑相乘得五千四十九步四歸而得

一該一千二百六十二步四分步之一以畝

法二四歸除之得五畝二分五厘不盡二步

四分步之一

問四不等田東四十二步西五十六步南六十

四步北五十八步為田幾何答曰

右方田法

問勾股假令縣燈准日月于直路之南不知高
遠各幾何却就直路之北遠處設一木表高
一丈二尺得燈影一丈五尺又退近處設一
木表得燈影一丈兩表之間地二丈五尺間
北表燈影盡處至燈下地遠幾何如縣去地
幾何答曰遠九丈高七丈二尺何也前影一
丈五尺後影遠二丈五尺地只得一丈卽以
餘數五尺爲法除之退三表位則前影盡矣
又以表間地三丈乘之共七丈五尺并前影
一丈五尺故曰遠九丈也遠旣九丈矣以前
影一丈五尺除之退六層表位而九丈盡却
以表間一丈二尺六層乘之得七丈二尺故
曰高七丈二尺也餘以類推

右勾股測天法

演禽法

角木蛟

亢金龍

在辰

氐土貉

房日兔

心月狐

在卯

尾火虎

箕水豹

在寅

右東方蒼龍七宿天之東陸也

斗木獬 牛金牛 在丑 女士蝠 虛日鼠

危月燕 在子 室火猪 璧水偷 在亥

右北方玄武七宿天之北陸也

奎木狼 婁金狗 在戌 胃土雉 昴日鷄

畢月鳥 在西 觜火猴 參水猿 在申

右西方白虎七宿天之西陸也

井木犴 鬼金羊 在未 柳土獐 星日馬

張月鹿 在午 翼火蛇 軫水蚓

右南方朱雀七宿天之南陸也

日宿例

一元虛 二元奎 三元畢 四元鬼

五元翼 六元氏 七元箕

時宿例

日月火水木金土
虛鬼箕畢氏奎翼

七元每元七曜移一位如一元日在虛是子

時二元日在鬼三元日在箕也一元月在鬼

是子時二元月在箕也餘以類推

將星例

甲子 巳卯 甲午 巳酉

活曜例

凡起天禽實有從日鳥月貉火狼中水蛇木
鼠金羊上土宿常從箕上逢

推時禽泊處吉凶例

日午月未火寅水甲木亥金巳土申乾支上
順數山水田園井刀砧草岬風湯火

占法

二月十二日丙子宿值氏土貉他禽箕水豹

他禽是麟禽所得他禽

月將星三元甲子畢月鳥

辰時值翼火蛇我禽泊在子上 角木蛟我禽

是活曜所得天禽

凡占看授時曆本日二十八宿值何宿即憑

其宿看屬何禽七曜中何曜 假如曜屬土

憑土字就翼上起一元是翼二元是虛三元

是鬼緣本日將星是三元故用鬼就子上起

時鬼具一子時順數到辰時是翼火蛇是我

禽也即將將星畢月鳥就辰上順數尋時禽

翼火蛇泊在子上就子上逆數至辰是箕水
豹是他禽也 又用時禽火字取活曜奎星
就寅上逆數尋時禽至寅上是翼卽翻倒順
數至辰上是角木蛟是我禽也 又推泊處
吉凶時禽是火就寅上順數至泊子處是陽
則泊不得其所也大要要時禽伏日禽天禽
伏地禽爲妙

奇門遁甲法

天有三奇乙丙丁 六儀戊己庚辛壬癸

人有八門一休二苑三傷四杜五開六驚七

生八景

範數一吉九凶洛書之數也

甲者太乙人君之象十干之首常隱於六儀
之中故名遁甲

天有九星一天蓬坎水二天內坤土三天衝震木四

天輔巽木五天禽中土寄於坤位六天心乾金七天柱兌金

八天任艮土九天英離火

三奇者何蓋甲君象所畏者庚庚爲七煞之
讎也甲妹之乙妻於庚能救甲故爲乙奇甲

木生火男与女丁火能尅金庚故丙爲二奇
丁爲三奇奇以日月星名日爲萬木之華陽
精所成也乙屬木故曰日奇丙丁火俱南方
離明之象月行南方中星考於南方故丙曰
月奇丁曰星奇以其有照臨之德也

五陽時者何甲位旣尊戊位同之乙丙丁爲
三才故甲乙丙丁戊五陽時善神治事爲吉
也戊之同甲者如一圖甲在一位戊亦在一
二位亦在二位也

九星配各方之色

一貪狼白 二巨門黑 三祿存碧

四文曲綠 五廉貞黃 六武曲白

七破軍赤 八左輔白 九右弼紫

奇門十八局一局爲一圖自冬至至芒種陽
遁爲九圖自夏至至大寒陰遁爲九圖

地盤安八門八卦九星三奇六儀其八門永
爲直使

天盤九星三奇六儀其六甲爲直符其六儀

三奇為年月日時之干以直符加臨其上

人盤八門為直使加臨太歲月建正建日辰寅

干支處又定有九天九地太陰六合玄武白虎

騰蛇依直符加臨

地盤不動天人等盤隨局轉移加臨既畢乃

看圖之所載何方得吉門三奇得使不得使

看星門反伏吟丙背庚格擊刑入墓門迫白

虎騰蛇朱雀青龍等格不陷方可用

陽遁冬至後十二節逆奇順儀陰遁夏至後

十二節順奇逆儀皆主時干而論

如陽之一局甲在一則乙丙丁三奇逆為九

八七戊巳庚辛壬癸六儀順為一二三四五

六如陰之一局甲在九則乙丙丁三奇順為

一二三戊巳庚辛壬癸六儀逆為九八七六

五四是奇儀之順逆而甲戊之同位可見矣

十二宮 一長生二沐浴三冠帶四臨官五

帝旺六衰七病八死九墓十絕十一胎十二

養金木水火土

甲子直

三宮甲戌加二宮甲午加九宮

甲辰加四宮甲寅加四宮皆是六儀刑擊

乙加甲戌甲午丙加甲子甲申丁加甲寅甲辰爲得便

三奇遊旺地故乙天居未庫丙居戌庫丁屬

火金居臨官宮

接氣超神法

神日神也氣節氣也詳見奇門歌

衣

上古穴處衣毛未有制度後代以麻易之先知爲上以制其衣後知爲下以制其裳衣裳始備黃帝堯舜垂衣裳蓋取諸乾坤故衣玄而裳黃旁觀翬翟草木之華乃染五色始爲文章以表貴賤而天下理

虞書曰予欲觀古人之象日月星辰山龍華蟲作績宗彝藻火粉米黼黻絺繡備十二章夏殷之代相襲

冠

上古衣冠帽皮後代聖人見鳥獸冠角乃作冠
纓黃帝造旒冕始用布帛唐虞二代無文至周
六冕章數始備

黃帝作冕垂旒目不邪視也充續示不聽讒言
也

却非冠

却敵冠

帽

葛巾

車

上古聖人覩轉蓬而爲輪輪行可載因物之生
復爲之輿輿輪相乘流運無極任重致遠以利
天下

考工記曰一噐而工聚焉者車爲多上蓋爲規
象天二十八橑象列宿方輿象地三十輻象一
月前視則聽鑿和之響旁觀則睹四時之運等
威旣辨貴賤有序故書曰明試以功車服以庸
人皇乘雲駕曰抵 五龍氏乘龍上下以理

黃帝作車

少昊駕牛

陶唐彤車

虞鸞車

夏鈎車

亦曰山車亦曰金根車

周

五輅一玉
二金輅樊纓九就建太旂以賓同姓三象輅樊纓七就建大赤以朝異姓四革輅樊纓五就建大帛以卽戎五木輅亦五就建大麾以田
春滅典籍舊制多亡因金根車爲帝軫玄旗阜旂以從水德
紀里鼓車
白鷺車
鸞旗車
辟惡車
耕根車一曰芝車魏建赤旗以籍田
鼓吹車上施層樓四角金龍銜流蘇羽葆凡鼓吹陸則樓車水則樓船在殿遲則畫筍簾爲數
上有翔鷺棲烏梁制也
象車
黃鉞車
豹尾車周制也象君子豹變尾言謙也軍正用之
淮南子執豹皮以正其衆
建華車

經世要談

應迹以委順爲主然必明於人情物理然後能委順可以接人處事無事理之障矣委者除事障也事障只是情欲順者除理障也理障只是意必有生皆爲物所引故當委之有身又安得無事故又當順之委而順之則雖應物實未嘗

有物也委順必先於明理脩身必先於格物也
動若水靜若鏡應若響委順也動若水者可行
則行可止則止行止無心也靜若鏡者物來則
照物去則虛空洞無物也應若響者大扣大鳴
小扣小鳴不扣不鳴也若鏡無意也若水無必
無固也若響無我也

靜坐養元神元是吾儒底事世儒槩闢爲仙釋
却去作下半截工夫虛勞一生却無箇着落識
者又欲假仙釋靜養來立脚而後去反到吾儒
上豈是道理

習氣不除如何了道習氣如蝓蟻但知有糞丸
堅不肯放也有物過眼必看有聲入耳必聽小
小入意卽喜小小拂意卽怒小小利害卽生恐
懼皆習氣也

人只有自愛之私便自天地閉塞賢人隱有氣
節者便自愛其氣節有事業者便自愛其事業
有技能者便自愛其技能有文學者便自愛其
文學如此便私小了人莫不自愛不知自愛反

是自害人但能看此心與天地一般便有天地變化草木蕃盛意思則凡氣節事業技能文學見之猶筍屣耳是之謂大愛其身

人只是不曾存得真心真心無一毫氣質纔惹氣質便是私意私意潛伏在內人多不自覺只說我能去私去蔽一旦心不存便依舊發出來如人戒酒不真知酒之決能殺已纔戒一番他日不覺牽迷將去

周江郎云無爲名尸勘破幻妄也無爲謀府無思也無爲事任無爲也無爲知主無知也然湏定得性了方行得四者不然實行不去莊子曰吾以無爲爲樂矣又俗之所大苦也太顛曰衆人而不思不爲則天下之理幾乎息矣應事接物只是一箇情字爲累若無情則無累矣故曰聖人無情

吾輩學問貴包荒韓魏公一生只是包荒故能得成相業吳遣二才士使蜀武侯甚偉之後二人伏誅武侯云此人只是黑白太分明吾輩只

以天地爲吾一心何所不容中間自然物各付物今人纔向學便分黨相非抑何見之小也元東陽鹿皮子謂秦漢而下說經而善者不傳傳者多未善淳熙以來講說尤與洙泗不類嘗自謂明月之珠失之二千年乃獲之牧豎之手其言曰神所知之謂智知天下殊分之謂禮知分之宜之謂義知天地萬物一體之謂仁禮復則和之謂樂國家天下一枳也枳一爾而穰十焉枳有十而一視之其於人則賢却記得許多可謂玩物喪志謝聞此語汗出浹背明道却云只此便是惻隱之心及看明道讀史又却定行看過不差一字心甚不服後來省悟却將此事做話頭接引博學之士此項意思極難分別此便是仁也發而視之穰有十其於人則君臣父子長幼之別刑賞予奪之殊所謂禮也視十爲十者禮之異視十爲一者仁之同天下萬殊之分視聽言動之宜所操者禮之柄耳鹿皮子却是獨到之學

謝顯道自負該博對明道舉史書不遺一字明道曰王霸之分

古人耻其君不爲堯舜耻其民不爲堯舜之民必有是志方做得光大事業孔子謂管仲器小管仲功非不高爲其元無是志故所就只如此耳行義達道古人多不如志寧甘死蓬蒿而不悔者謂何須要識得此義

人莫不剛愎自信剛愎自信卽是自絕誰敢語以至道凡人有才氣而復虛已下問者實大難得

防身當若禦虜一跌則全軍敗沒愛身當若處子一失則萬事瓦裂涉世甚艱畜德宜豫布人以恩而外揚之則棄教人以善而外揚之則讎正德十六年朝中諸君子諫南巡罰跪五日燕山衛都指揮張雲托以黑帝語欲面朝廷云南巡決有禍文臣忠諫不宜加罰時權奸朱寧沮之使不得前遂刺胸以死諫竟係之獄論重辟不協有旨杖八十邊方編管杖畢猶彊步出

東長安什死 朝廷亦竟以南巡大行如其所
托云於乎今日權奸何在張雲赫赫有生氣矣
自古刺史鎮臣得自辟其叅軍記室擇其賢者
薦之於朝廷然後大用之此法最美刺史據聲
望以辟人凡部下之賢者鮮不就辟故多得人
亦鄉舉里選之遺意也後世科舉之制行詞章
習盛繇是人才混淆古意落盡矣

君子貴通天下之志疾惡太嚴則傷公明之禮
舊習一處消百處消卽致曲一處得百處可得
學道是意誠意誠如救頭豈以喧擾中止

一日偶於市肆見廢書數冊皆蟲鼠之餘余
欲索觀其人謂將用覆甌不足觀也彊之始
得觀則此編在焉出鄭吏部手書無疑然以
印章考之知爲高宗呂家所藏首易論河圖
洛書次洪範論及洪範數補叙次田制論次
九章乘除法次演禽法次竒門遁甲法終以
衣冠車之制皆探賸索隱鈎深致遠非世儒
所能窺測者先生於學可謂博而精矣先生

歿且七十餘年其書片楮數行人皆珍惜况
此編繩頭萬計又關理數之微尤可寶也然
不糜爛于醯鷄者如綫哉因重加補葺閱之
帳中皆萬曆丁酉歲四月十八日後學徐燭
惟和題

是刻乃少谷先生所著而手錄者年久蠹蝨
苦無副本間有殘闕行字未輕以意增補聊
附闕文之義敢以質之高明 邵捷春謹識

鄭少谷先生全集卷之二十

終

